



наведи телефон

# Лүимә сәрипос

27.06.2024  
№ 12 (1318)

www.khanty-yasang.ru

Основана 11 февраля 1989 года

E-mail: gazeta@khanty-yasang.ru




Ты хурит округ кўцаиг рўпитан хум Руслан Кухарук ёт «Лүимә сәрипос» мәнщи газета вәрнә хөтпат пöслым öлэгыт – Василий Мехнин, Валентина Узель, Тамара Мерова, Надежда Рагимова (тав «Ханты ясаң» газетат рўпиты), Галина Кондина ос Людмила Теткина. Лүпта этпос 21 хөталэт тән Ю.Н.Шесталов нампа мўйлупсал майвёсыт, ты кастыл яныг кўщай хумн янытлавёсыт. Ты урыл 2 лөпсыт ловиньтән.

<b>Ты номерт ловиньтән:</b>	<b>Вәрнә рўпатаныл мӓгсыл янытлавёсыт</b>	<b>Хум округ кўцаиг паттувес</b>	<b>Султум</b>
▶ 10-11	▶ 12-13	▶ 15	▶ 16



Нõх-патум мӕхум Р. Кухарук яныг кӯщайн янытлавёсыт



М.Т. Двнянинова ос Р. Кухарук

## Вӕрнӕ рӯпатаныл мӕгсыл янытлавёсыт

**Л**овиньтан нӕпак хансум мӕнъщи ӕйка Юван Николаевич Шесталов намаим премиял мӕн округут мӕхум касыл щирыл кӕсың тӕл мивет. Тӕн сossa мирыт пӕс йис вӕрмаляныл ос щӕнъ лӕтҕаныл ӕлаль тотнӕныл мӕгсыл янытлавет.

Яныг кӯщай хум Руслан Кухарчук тӕнанылн тох лӕвыс:

– Мирн вӕнӕ мӕнъщи ӕйка Юван Николаевич Шесталов холытан нам-хӕталӕ ӕмтнув. Тав сӕв ӕмас потрыт, стихыт мӕнъщи ос руц лӕтҕыл хансыс, такви щӕнъ лӕтҕе сака янытластӕ. Нӕн, тыг ӕхтум мӕхум, ты хӕтпа вӕрум рӯпататӕ ӕлаль ань тотылын. Тав намыл намаим премиял мӕн сossa мӕхманув пӕс йис вӕрмаляныл ос щӕнъ лӕтҕаныл нӕх-вӕрмалтан мӕгсыл ань тах янытлы-янув.

Ты юи-пӕлт кӯщай хум сӕвсыр мӕныл ӕхтум хӕтпат диплом-нӕпакыл ос хорамың лӯпталь мӯй-луптасанӕ.

Ты тӕл хӯрум хӕтпат: мӕнъщи ӕква Мария Тихоновна Двнянинова, ханты хум Владимир Егорович Енов ос ханты

нӕ Наталья Владимировна Крюкова янытлавёсыт.

Мария Тихоновна Двнянинова Хӕльӕс район Хулјомсунт пӕвылт ӕлы. Тав сӕв тӕл лӕккарыг пӕвылт рӯпитас, пенсиян патхатме юи-пӕлт стихыт, потрыт мӕнъщи ос руц лӕтҕыл хансунҕке патыс. Потранӕ «Лүимӕ сәрипос» газетан кӕтыянӕ. Мария Тихоновна мӕнъщи пӕс йис вӕрмалит вӕнӕ хӕтпаг ӕлы ос турсуиң ӕрыг ӕргуңке хӕсы. Пӕвлың мирн тав янытлаве, мӕнъщи мир пӕс ӕлупса урыл потыртаңке, ӕргыт ӕргуңке ос стихыт ловиньтаңке школан ос ялпың хӕталыт ӕлыгланӕныл порат акваг тув вӕвыглаве.

Владимир Егорович Енов Ханты-Мансийск уст ӕлы. Тав «Ханты ясаң» намба газетат сӕв тӕл рӯпиты. Ос ты коньпаль ханты пӕс мӕйтыт аква-

атыянӕ ос нӕпакыг тӕра-тыянӕ. Ханты хум вӕти-хал округ янытыл яласы, усың, пӕвлың мирыт, школат хаництахан нӕврамыт ӕт хӕнтхаты-глӕлы, потрыт, стихыт тӕнанылн ловиньты.

Наталья Владимировна Крюкова Октябрьский район Шеркалы пӕвылт музейт рӯпиты. Тав яныг-мам пӕвлытн пӕс йис порат мӕхум хумус ӕл-мыгтасыт, та урыл сӕв потрыт аква-атыс ос «Семь названий села Шеркалы» намба нӕпак тӕратас. Хӕнтлаңке ялум хӕтпат урыл потрыт аква-атыянӕ, тох тав сӕв хӕтпа наманыл аква-хассанӕ ос «Шеркальцы – участники Великой Отечественной войны 1941-1945гг» намба нӕпак тӕратас.

Организацият халт «Лүимӕ сәрипос» мӕнъщи газетат, Нижневартовский район Варьӕган пӕвыл школат ос Мегион уст Региональный историко-культурный центр-колт рӯпитан хӕтпат нӕх-патсыт, тӕн яныг кӯщайтн ӕс янытлавёсыт.

Варьӕган пӕвыл школа ты тӕл 85 тӕлӕ тах тӕвлы. Нӕврамыт хаництан кол кӯщай нӕ Светлана Антропова лӕвыс:

– Школат ӕгит, пыгыт щӕнъ лӕтҕыл потыртаңке, сossa мӕхум каснӕ вӕрмалитн хаництыянӯв. Хӯл алыцлан, вӕраян ос сӕлы урнӕ вӕрмалит урыл ӕс потыртыянӯв. Ань школавн 106 ӕгирицит, пыгрицит ялантӕгыт, тӕн халанылт сӕв нӕврамыт вӕрныл Варьӕган пӕвылн хаництаңке ӕхталӕгыт. Таи лӕль, юи-ӕвыл тӕлыт ӕгит-пыгыт щӕнъ лӕтҕаныл шар ат вӕганыл. Юн оманылн-ӕтянылн ханты манос ӕрн лӕтҕыл потыртаңке ат хаництавет.

Юван Шесталов намба премиял мӕхум ос организацият касыл щирыл 2013 тӕл пӕсныл кӕсың тӕл мивет. Юи-ӕвыл тӕлыт хӯрум хӕтпат ос хӯрум организацият янытлавет. Ты ӕлы-пӕлт ты премия-олныл кит хӕтпаг ос аква коллектив майлувёсыт.

Людмила ТЕТКИНА

## Хүрүм Думан пёриим мәхүм сапрәнияныл

**М**ән округув, Ямал мә ос Тюменский область хүрүм Думатт рүпитан депутаттыт сапрәнин атхатыгләлэгыт ос пирмайтым сәкконыт урыл потыртэгыт. Юи-бывыл тамле сапрәни тув пёриим хөтпат лүпта этпос 14 щислат вәрыгласыт. Төнт тән тәнки өлнә мәнылныл ищхйпың ут хосыт халанылт потыртасыт.

Мән округув Ханты-Мансийск үсныл Борис Хохряков, Еремей Айпин, Александр Сальников, Наталья Запачова ос Виктор Сысун депутат-хөтпат ты сапрәнит рүпитасыт.

Өвлэт тән хүрүм Дума пәлныл хоты мәхүм янытлан нэпакыл миңкве эри, та урыл потыртасыт. Сәв тәл кәркамыг рүпитан хөтпат ос организацият Тюменский, Ямал ос Югра Думат пәлныл янытлан нэпакыл тах мивет.

Ты юи-пәлт мәньлат хөтпат вәрум рүпатаныл урыл потыр блыс. Мән округ Думавт мәньлат әгит, пыгыт манхурип эрнә тәла вәрәгыт, та урыл депутат-хум Александр Сальников ләтың ләвыс. Округ Думат «Молодёжный парламентыг» ләвнэ мән 54 мәньлат әгит-пыгыт хасхатым өлэгыт. Тән тәнки сапрәниянылн вәтихал атхатыгләгыт ос мәньлат мәхүм мәгсыл манхурип сәкконыт пирмайтаңкве эрәгыт, та урыл тот потыртэгыт. Ты хөтпат «О молодежной политике» нампа сәкконын сәв мөт нэпакытын эрнә ләтңыт хансуңкве нәтсыт.

Сосса мәхүм Ассамблея кұщай хум Еремей Айпин «О бесплатной юридической помощи» нампа сәккон урыл ләтың ләвыс. Ань ты нэпак щир



Б.С. Хохряков

рыл сосса мәхүм, нусаг өлнә щәмьят, хөнтлаңкве ялум хөтпат ос сәв мөт мәхүм юристытн олн ойгнә тәл нәтавет. Юи-бывыл тәл сыс акв сөтыра арыгкем элумхөлас ты щирыл нәтвес.

Депутат-нә Наталья Запачова пәвлың мир мәгсыл хансым сәккон урыл потыртас. Ань пәвлыт рүпитан нъяврамыт ханищтан мәхүм, ләккарыт, тәрпи тыналан ос спорт щирыл рүпитан хөтпат ос сәв мөт рүпата вәрнә мәхүм олн-нәтмилыл ойтавет. Тән нәйпос, вит, рөг ойтум 50% сәвит олнаныл ювле мивет. Мән округувт 15 сөтыра арыгкем элумхөлас ты нәтмил ань выгыт.

Ямал ос Тюменский область Думан пёриим хөтпат ос тән мәнылт пирмайтын сәкконыт урыл сәпрәнит өс потыртасыт.

Людмила ТЕТКИНА



## Нъяврамыт ханищтан хөтпат нөх-патсыт

**М**өлтү тәл пәсныл ханищтап, наука департамент ос Әс-угорский институттыт рүпитан хөтпат мәньщи, ханты, ёрн ләтңыл нъяврамыт ханищтан мәхүм халт «Оберегаемое слово предков» нампа касыл вәрыгләгыт. Ты тәл 10 районуыт ос сәвсыр үсытт өлнә 23 хөтпат тәнки нэпаканыл ты касылн кәтсаныл. Хүрүм номинацият ты мәхүм нөх-патсыт:

«Педагогический талант» нампа номинацият:

1 места – Захарова Марина Николаевна, Белоярский район Касум пәвлыт воспитателиг рүпитан нә.

2 места – Овчинникова Елена Владимировна, Нижневартовский район Охтеурье пәвлыт бвыл школат рүпитан нә.

3 места – Макарова Майя Ефимовна, Ханты-Мансийск үс «Лылың сююм» нампа колт рүпитан мәньщи нә.

«Сохранение традиций» нампа номинацият:

1 места – КатYROва Евгения Викторовна, Сургут үс нъяврамыт үргалан «Аленький цветочек» нампа колт воспитателиг өлнә нә.

2 места – Куклина Маргарита Павловна, Нижневартовский район Варьёган пәвлыт воспитателиг рүпитан нә.

3 места – Обирин Анжела Егоровна, Сургутский район Угут

пәвлыт нъяврамыт щәнь ләтңыл ханищтан нә.

«Педагогические инновации» нампа номинации:

1 места – Орехова Анжелика Николаевна, Сургутский район Русскинская пәвлыт школат нъяврамыт щәнь ләтңын ханищтан нә.

2 места – Вахрушева Валентина Ильинична, Хөнтаң район Шугур пәвлыт бвыл школат нъяврамыт ханищтан мәньщи нә.

3 места – Вахат Анастасия Евгеньевна, Белоярский район Полноват пәвлыт школат нъяврамыт щәнь ләтңын ханищтан нә.

Касылт бвыл места вим хөтпат 300 сөтыра солкөвил, китыт места – 200 сөтыра солкөвил ос хүрмит места – 100 сөтыра солкөви мивет.

Әс-угорский институтныл кетым ляххал мәньщи ләтңыл  
**Людмила ТЕТКИНА**  
хансытэ

# Хум округ кўщаиг паттувес

**М**ән округувт нилахуйплов тәл сыс яныг кўщаиг Наталья Комарова рўпитас. Наталья Владимировна 2010 тәлт мәнполь этпос бвыл хөталт Ханты-Мансийский автономный округ – Югра мāt губернаторыг паттувес.

Ты элы-пәл хөталыт Дмитрий Медведев, Россия Президентыг блум хум, тав наме ләвыстә ос округ Дума депутатыг тав мәгсылә пуссын номтаныл патыс, тән кәтпос пинсыт.

Ты сыс Наталья Владимировна округувт бнә мир мәгсыл сәв емас рўпата вәрыс, такви яныг ұсытын ос мән пәвлытын ялантас, мир эт хөнтхатыглас, тән блупсанылтыл пұмшалахтас. Маныр тәрвит тән бщсыт, кўщай нән потыртасыт.

Сосса мир мәгсыл акв яныг программа хансым блы, тот кол өвтнә олн мәгсыл хасхатам мәнщит, хантыг, ёрныт субсидия-олныл мивет. Ты тәлыт сыс, Н. Комарова рўпитеме порат, сәв колтәглыт колыт өвтсыт манос танти бнә кол ұнттысыт, тонт программан сака сәв олн тәстыглавес.

Сосса мир ялпың хөталыт ос округувт акваг вәрыглавет, янытлавет. Туи мәнхәпыл каснә мәгыс мирхал касыл вәрвес, ань мот хон мәныл мән палтув мәнхәпыл касуңкве бс өхталәгыт.

Тәлы порат Югра мән янытыл бнә сәлың мәхум халанылт касәгыт, тән нупыланыл сунсуңкве сәв пәлыл мир атхатыгләгыт. Ты коныпал «Уринәква хөтал», «Вөрщик хөтал», «Этпос пұри» ос мот ялпың хөталыт ань округ мирувн вәвет, сосса мир эт тананыл мүйләгыт.

Ос 2024 тәлт яңк нәтнә этпос вәт хөталт Наталья Владимировна ләвыс, тав юи-бвыл хөтал рўпите ос мот мән мины, мот рўпата патхаты.

Тонт тәра Москва ұст Россия Президент Владимир Путин Руслан Кухарук тыг рўпитаңкве тәтыстә, тав ань таквсы мус ВРИО губернатора рўпата вәруңкве паты. Таквсы округ Дума акван-атхатәгыт ос округ кўщай тах пәриёгыт.

**Руслан Кухарук** Югра мән өхтуме порат, тән Наталья Комарова ос округ Дума депутатыг пуссын акван-атхатыгласыт, тән ётаныл потыртаңкве Владимир Якушев, Россия Президент полномочный представителе, өхталас. Наталья Комарова рўпитеме мәгсыл сәв емас ләтңыл, пұмашипа ләтңыл ләввес, янытлавес.

Владимир Якушев йильпи кўщаиг паттым хум Руслан Кухарук нупыл ләвыс, тав бс акв тох кәркамыг, апрыңыг вос рўпите, ань бнә программат өмщакв вос уральтыянә ос мәкыг вос вәравет.

Руслан Кухарукты элы-пал Тюмень ұс кўщаиг хөт тәл рўпитас. Тав 1979 тәлт яңк нәтнә этпос нелолов хөталт Урай ұст самын патыс, тот гимназия сака өмщакв әстластә. Ос элалы Тюмень ұсн ханищтахтуңкве ми-нас, Тюменский государственный университет



*Р. Кухарук ос Н. Комарова*



*Кўщайт Дума колн акван-атхатыгласыт*

әстламе юи-пәлт мирколт рўпитаңкве патыс.

Өвләт кол ұнттын мāt уральтым рўпитас ос ётыл пәс колныл вәнтлын мәхум нәпаканыл атыс. Ёмщакв ос молях рўпитеме мәгсыл акваг нәңхаль кўщаиг та паттувес. Ос юи-бвылт 2018 тәлт яңк нәтнә этпост Тюмень ұс кўщаиг пәриявес, тот рўпитас.

Руслан Николаевич Ханты-Мансийск ұсн өхтуме порат, бвыл

рўпитан хөталанәт округ миркол янытыл ёмыгтас, рўпитан мәхманә эт вәйхатас. Хотьют, хумус рўпите ос маныр вәри - таи сунсыс. Тувыл Ханты-Мансийск ұс сунсуңкве ұс кўщай Максим Ряшин өт ёмыгтасыг ос яласасыг.

**Ищхыпұн мāt вим  
потыр мәнщи ләтңыл  
Галина КОНДИНА  
хансыстә**

# Лөпмуст ялпың хөтал вәрыглавес

**Л**үпта этпос 21 хөталэт Хальүс район Лөпмуст пәвылт ялпың хөтал вәрыглавес, руш щирыл намайлвес: «День деревни Ломбовож».

Мөлтү порат пәвыл 130 тәлэ төвлыс, ос мир ань уш акван-атхатуңке вөрмысыт. Мәньши мәхум Хальүсныл, Ягримныл, Саранпәвылныл, Кимкъя-сүйныл, Кульпасныл ос мөт пәвлытныл ос ұсытныл ёхталасыт.

Кульпас миркол кұщай нэ **Людмила Петровна Албина** мәхум ёт пашалахтас, тох ләвыс:

– Лөпмуст пәвыл мир ос мүй мәхум, матъемас акван-атхатасүв. Нәнн ам пәвыл ялпың хөталыл янытлыянум! Нән пуссын сәв рүпитэгын, эрнэ тәлат вәрегын, таимәгыс пәвлын тамле нётнэ, сыстам, сәв йильпи колыт үнтүвёсыт. Тыт ләпка, пүльница, школа ос мөт эрнэ колыт блэгыт.

Ам ос Лөпмуст яныгмасум, таимәгыс ты мә эруптылум, тыг вәтихал ёхталэгум. Лөпмуст пәвыл ятил мир, пуссын пустәгыл блән, сөтыңыш, щуниңыш блән!

Тувыл Людмила Петровна ос Саранпәвыл миркол пәлыл ёхталам хөтпат Лөпмуст мәхум янытлан нэпакытыл ос мүйлуп-

сатыл мисаныл. Лөпмуст блнэ шар яныг хөтпа наме ләввес – Светлана Николаевна Хозумова, шар мәнь хөтпаныл Людмила ос Николай Сайнаховыг тән пыгрищен Матвей, ты тәл самын патыс. Тән ос янас мүйлупсатыл щёпитавёсыт, янытлавёсыт.

Саранпәвылныл ос Кульпасныл эргын-йквнэ мәхум ёхталасыт, эргысыт, пумыщ сценкат суссылтасыт. Лөпмуст мәхум ос выступайтасыт, мәньши ос руш эргыт щёпитасыт, ныврамыт стыхыт ловиньтасыт.

Татем нётнэ сцена вәрыглавес, сәвсыр шарикытыл хорамтәлвес, хурит нөх-тагатәлвёсыт. Мощ элыннув ныврамыт мәгыс ёнгасан, поргын кан щёпитәлвес, мәнь мәхум тот маттем та ёнгасасыт, хайтыгтасыт.

Сәвсыр палаткат тұщталавёсыт, мәхум матырәти ёвтуңке вөрмысыт – тәнүт, пормас ос ёнгынүтыт. Ягримныл тәнти рүпата вәрнэ хөтпат ёхталасыт, ныврамыт мәгыс атың тәнүт тотыгласыт,



тыналасыт. Пәвыл мир ос мүй мәхум нярхулыл тыттувёсыт, хұл исмитыл ос исум щәил айтвёсыт.

Саранпәвылныл «Сделано в пауле» мәщтырлан колт щаквщин нэквет ёхталасыт, мәхум сәвсыр пормасыт кәтыл вәруңке ханищтасаныл. Тувыл мәньши ос ханты мир ёнгилыт ёт тотыгласыт, ныврамыт ос яныгхөтпат тот маттем та ёнгасасыт.

Этипәлаг, аквхуйплов щёс порат, салют блыс

– ань писалъ нөңхаль пәтамты, нумын сәвсыр хорамың нәит нәглапёгыт, мощ султгёгыт, тувыл хотталь та сөймёгыт. Лөпмуст мәхум ләвсыт, тамле ут пәвланылт нәмхуньт ат блыс.

Мән, «Лүймә сэрипос» газета вәрнэ хөтпат, Лөпмуст пәвылт блнэ мәньши мәхманүв ялпыңхөталыл янытлыянүв! Пус кәт, пус ләгыл вос блэгыт, Нәй-Отыранылн вос үргалавет!

**Светлана РОМБАНДЕЕВА**



# Султум

## Искорка

### Няврамыт үщлахтын наканыл

Туи сыс няврамыт мағыс савсыр үщлахтын нак щёпитаве – ман нас үщлахтын ма, ман матыр ханищтан ос мащтырлан вәрмал ханищтэгыт.

Хулюмсүнт павылт ты тув мәнщи няврамыт мағыс бвил щёс «этно-площадка» вәрвес. Няврамыт мағыс тыт ханищтан хөтпат ос йис блупса ванэ махум кит сат рүпитаңкв патэгыт: мәнщи латың ханищтаңкв, мөйтыт ос йис блупса урыл потрыт хунтлаңкв, сәңквилтапыл тәңламаңкв, ййквуңкв, эргуңкв ханищтаңкв, сак хартуңкв ос нас ёнгалтаңкв патавет.

Ты этноплощадка вәрнэ мағыс оln-нётмил округ миркол палыл майвес.

**Александра Михайловна Васильева**, няврамыт мағыс үщлахтын нак щёпитама хөтпа, ты вәрмал ханищтан урыл тох лавыс:



Хулюмсүнт павылт үщлахтын няврамыт

– Тыт Хулюмсүнт павылт тамле этноплощадка вәруңкв мән мөлт тал пасныл щёпитахтуңкв патсүв, ос ань ущты вәрмалиг патыс. Ань ты лүпта этпос 17 хөталэныл этпос холнэг мән тыт няврамытын савсыр ханищтапыт суссылтаңкв патэв.

Ханты-Мансийскүсныл «Лылың сөюм» колт рүпитан кит ханищтан нэг

ёхтысыг: Ольга Мартыновна Норова, тав няврамыт мәнщи ләтңыл потыртаңкв ханищтыанэ, тувыл ос акв мәнлат аги Лилия Норова, тав няврамыт сәңквилтапыл ёнгуңкв ханищтыанэ.

Мән тыт АНО «Точка Росы» махум ёт акв ёрыл няврамыт ёт рүпитэв – Ольга Баранова, Татьяна Головина, Валерия Кивелева, Надежда Маслова, тувыл мөйт-йис потыр ванэ махум Елена Самбиндалова, Наталья Тасманова, Анна Алгадьева. Няврамыт хот ул вос кастамлавет, мән касың хөтал йильпи пищ ханищтэв.

**Ольга Мартыновна Норова** тох лавыс:

– Ам Александра Михайловнан няврамыт мәнщи ләтңыл ханищтаңкв тыг вөввёсум. Лов арыгкем талыг ёмтыс, ам блнэм палытыл тамле мят рүпитанэм, туи үщлахтын

сменат «Мән Ысквет» блсум.

Хунь тыг ялнэ урыл китыглавёсум, ам тара номтум патыс, тамле ёмас вәрмал: мән тыт Хулюмсүнт павыл урыл пёс блум вәрмалит ханищтэв, йис блпанув, оманув, атянув блупса ханищтэв.

Ты сака ёмас эрнэ вәрмал: атэ мәнки магсылув, няврамыт мағыс. Няврамыт пуссын савсырыт: павлың няврамыт коныпал, төват үсытныл блнэ няврамыт нас туи сыс анёкваныл палт ёхтысыт ос тыг ялантэгыт, тувыл төват янгыт, төват мәнит. Таи мағыс касың ханищтап ёмщакв астылүв – няврамытын пүмаш вос блыс.

Тамле ты ёмас эрнэ вәрмал няврамыт мағыс Хулюмсүнт павылт вәрвес.

**Анна АЛГАДЬЕВА**



Павыл няврамыт



## Султум

Искорка

### «Төрүм Мә» – татем ёмас, нётнэ ма́кве

Касың тәл лүпта этпост Ханты-Мансийск үст «Төрүм Мә» музейт няврамыт маҕыс «Таксар махум – Крепкие люди» лагерь вәрыглаве. Агиришит-пыгришит тот үшлахтэгыт, ханищтавет, ань ворт хумус олуңкве эри, най пеламтаңкве ос колпал вәруңкве вос хәсэгыт. Тынакт тув ялантам няврамыт мощ потрамасыт, маныр вәрмаль тәрапаттысыт, манхурип тәла ханищтасыт.

#### Саша Карпов, 12 тәл

– Ам православный гимназият ханищтахтэгум. «Таксар махум» лагерьн мөлты порат ялантасум, тыт ань аквта хольт пумыщ. Ущ ёхтэв, мощ матыр ханищтэв, ёнгасэв, ос юв миннэ порав та ляпами, сәвтәла вәруңкве ат алымёв. Мөлхөтал ёвтыт вәруңкве ханищтахтасүв, нял тәратасүв. Төванакт ханищтан хөтпанув ләвёгыт, мәнти вос ёнгасэв, мән тай щәгтэв, «Гуси-лебеди» ос мөт ёнгил номылматэв, татем хайтыгтэв. Ты порат ам а́пшим ёт ёхтысум, наме Паша, 6 тәлэ төвлыс. Тыт ань сәв агиришит ос пыгришит ёт юрщмахтасмён.

– Я учусь в православной гимназии. Лагерь «Крепкие люди» я впервые посетил в прошлом году. Здесь мне очень нравится, время быстро проходит, незаметно, интересно. Вчера делали лук и стрелы, стреляли из лука. В свободное время устраиваем командные игры, например, «Гуси-лебеди» и другие. В этом году со мной пришёл мой младший брат Паша, ему 6 лет. Он тоже очень рад, что мама нас записала в этот лагерь, с радостью здесь занимается, узнал много нового. Теперь у нас есть много друзей, чему мы очень рады.

### «Төрүм Маа» – красивое место



Саша Карпов, Лёня Савицкий, Миша и Вова Вокалюк

#### Лёня Савицкий, 13 тәл

– «Таксар махум» тәла лүпта этпост 3 хөталэт овылтахтас, төнт ам нам-хөталум олыс. Тыт рүпитан хөтпат ос няврамыт а́нумн сәв ёмас ләтың ләвсыт. Вөрың мәт олуңкве, ёнгасаңкве сака пумыщ. Овыл хөтал мән музей урыл потыр хунтылысүв, округ сосса мирыт коланыл, сунаныл-хәпаныл ос мөт пормасаныл кәсаласанүв. Тувыл суссүв, нявраманыл хумус ёнгалтыяныл, манхурип ёнгилыт вәруңкве хәсэгыт, мощ ёнгасасүв. «Төрүм Мә» музей – татем ёмас, нётнэ ма́кве.

– Лагерь «Крепкие люди» начал свою работу 3 июня, в тот день у меня был день рождения. Сотрудники музея и дети меня поздравили, много тёплых слов сказали. Впервые в лагере я был в прошлом году в августе, здесь мне очень понравилось. Узнал много интересного о жизни коренных жителей округа, увидел постройки, лодки, орудия лова, а также игрушки, разные головоломки. Музей «Төрүм Маа» – красивое место, здесь мы с радостью играем, отдыхаем.

#### Миша Вокалюк, 12 лет

– Ты мәт ам щәгтым ёнгасэгум. Вова а́пшим ёт ёхтысум, 11 тәлэ төвлыс. Ам сәв лагеритт олыгласум, ос таи ләвуңкве таңхёгум – ты шар ма́к ёмас лагерь, тыт сымың хөтпат рүпитэгыт. Лагерь урыл а́нумн Лёва юртум потыртас, такви ос товылхәпыл Анапа үсн тыламлас, щәрщ вәтат исылтахты, пувлы, мён ос тыт үшлахтымён.

– Здесь я веселюсь, играю. Мы с братом пришли, зовут его Вова, ему 11 лет. Это самый классный лагерь, где я когда-либо был. Сотрудники музея все очень добрые, внимательные, помогают нам во всём. О лагере мне рассказал мой лучший друг Лёва, сам он улетел в Анапу, теперь там загорает, а мы здесь отдыхаем.



Дети ставят палатку

Няврамыт ёт Светлана РОМБАНДЕЕВА потыртас



## Султум

Искорка

### Агимән щәгтым ханищтахты

Ты хурит хонтаң мәнщи агирищ Ксения Егорова пöслым öлы. Тав Ханты-Мансийск үст öлнэ Окружная школа мастеров колт сәңквилтап тәныт сәңквилтаңкве ханищтахты. Тынакт школанылт концерт суссылтасыт, тув агирищ омаге-әтяге ёт ёхталас.

Ксения омагэ наме Анна, нән ань элаль тав потре ловиньтэлың.

– Сәңквилтапыл сәңквилтан школа агим сака эруптытэ, тыг щәгтым хайты. Ам öвлэт тавән нас ләвсум, эрың сосса мир тәныт ханищтаңкв патэтын. Тыг ёхтысамән, сәңквилтаңкве үнтыс, ань тыхөтал мус тув та яланты. Ты школат ханищтахтуңкве тавән сака мұсты, тыт ёмас, сымың мәхум рүпитэгыт.

Сәңквилтап тәныт сәңквилтаңкве тав Алексей Александрович Решиковын ханищтаве. Ты хум няврамыт ёт акваг ёмас номтыл потырты, мұсхал щирыл ханищтыяңэ, хұлытгыляңэ, таимәгыс тән тав палтэ хайтэгыт, тав ётэ ханищтахтуңкве таңхёгыт.

Ам хонтаң мәнщи нэ, Урай үст яныгмасум. Ос ам колтагыл мәхманум юн щәнэ ләтңыл ат потыртасыт. Атям ләвсас, тав öпаге-щәщёкваге мәнщи ләтңыл потыртасыг.

Ам тәнәтән ат васагум, ләтңув ат хұлыгласлум, рущ щирыл яныгмасум. Ханты-Мансийск үсн öлмыгтамум порат, сунсэгум, мәнщи мир

тәнти ләтңыл потыртэгыт, эргёгыт, ййквёгыт.

Ойкам рущ хум, наме Дмитрий, Саратов үсныл öлы. Тав öс агимән магыс номтэ сака ёмас, ләви, рүт мәхманэ накыт, эрыгсов тәныт вос вәганэ, вос ханищтыяңэ. Мән öс акваг пұмшалахтымән, агимән китыглылмән, манхурип тән ханищтас. Тав тай ювле щәгтым потырты, «Куккук эрыг», «Совыр сёюм» ос мөт тәныт ханищтас. Хоталь вöваве, хөт выступайтэгыт, мән ойкамөнтыл тув öс ялантымән, агимән нётыламән.

Ань мәнэ мәхум щәнэ ләтңыл сака ат потыртэгыт, ләтңув ос пёс накув ләщал-ләщал сөймуңкве та патсыт. Ты урыл номсуңкве, вәим, тәрвитуң. Ос таи ёмас, ань агимән пёс мәхманув хольт сәңквилтапыл сәңквилты, тәныт ханищты. Тувыл ос мәк таи – ты тэла тав эруптытэ, ты магыс ам номтум ёмас. Лүпта этпос öвыл хөталэт агимән 8 тәлэ төвлыс.

Мән, «Лүима сәрипос» газета вәрнэ мәхум, Ксения намхөталэт янытлылүв, пустагыл вос öлы, сөтыңыщ, шуниңыщ вос яныгми!



Ксения Егорова

### Наша дочь интересуется музыкой своих предков

– Я узнала, что у нас в Ханты-Мансийске есть Окружная школа мастеров, привела ребёнка, понравится ли ей, не знала. Но она с радостью стала заниматься, ей очень нравится. Придёт домой, всегда нам рассказывает: «Я сегодня выучила «Заячий ручей», а завтра песню «Кукушка» буду учить...». Она уже и на традиционной скрипке играла, была так рада, говорит: «Мама, я сегодня играла на хантыйской скрипке!»

Наверно, от отношения преподавателя много зависит. Здесь доброе, дружелюбное отношение Алексея Александровича к детям, они тянутся к нему, приходят на занятия с радостью, исполняют мелодии на санквилтапе.

Сама я кондинская манси, росла в Урае. Я не слышала родной язык, мои родители не говорили на мансийском. Прадед наш и прабабушка говорили на родном. А потом стал утрачиваться язык, и наши кондинские манси потихоньку ассимилировались.

Мой муж русский, он из Саратова. Мы с ним очень рады, что наша

дочь играет на традиционном музыкальном инструменте, знает мелодии, всегда её поддерживаем. Иногда мне кажется, что все мелодии одинаковые, а дочь знает все названия, различает их, понимает и, самое главное, ей это нравится. Первого июня Ксении исполнилось 8 лет.

Мы, журналисты газеты «Лүима сәрипос», поздравляем Ксению с днём рождения! Желаем ей здоровья, прекрасного настроения, летом хорошо отдохнуть, пусть исполняются все желания!

Светлана  
РОМБАНДЕЕВА



## Сосса мир олупса янытлылүв

*Ханты-Мансийск үст олнэ мәнъләт пыг Александр Замиралов сәңквилтапыл сәңквилты. Таве Окружной Дом народного творчества колт вәслум, китыгласлум, эрыгсов тәныт сәңквилтаңкве хәт ханищтахтас. Пыг тох потыртас:*

– Ам 2012 тәлт «Лылың сәюм» няврамыт ханищтахтын колт кәсаласум, ань агиришит ос пыгришит татем сәңквилтэгыт, тувыл ам ос тән етаныл ханищтахтуңкве патсум. Сәңквилтапыл сәңквилтанэм тынакт 12 тәлыг ты емтыс.

Школа асламум юипәлт, ЮГУ колн техно-сферная безопасность тәлан ханищтахтуңкве миасум. Ос сәңквилтапыл ань тыхәтал мус сәңквилтэгум, ты тәла аһумн сака мұсты. Омагум-әтягум ам мағыслум номтән емас, тән округ сосса мир, йис олупсаныл, эрганыл-йикваныл сака янытлыанән.

Мән Курганский областьныл олэв, омагум-әтягум руц нәг-хумыг, иң мәниг олмум порат Ханты-Мансийск үсн вәнтлысүв.

Омам наме Светлана Григорьевна, тав ләвме щирыл, мән сосса мир олупса эрыгсов тәныт хосыт ханищтылүв, вәңкве патыслүв.

Эргын-йиквнэ махум әт хәт-әти яласанэм порат, омам аһум акваг үритэ, хунь янытлан нәпакыл мивем, тав щәгыт. Төванакт нәх-патэгум манос китыт мөстал мивем. Тынакт мән Алексей Александрович Решиков әт Гран-при нампа нәпакыл майвесамән.

Александр ома тә  
**Светлана Григорьевна**

**Замиралова** ос акв-кит ләтың ләвыс:

– Пыгум мәниг олме порат, тамле Дом творчества кол аһим олыс, ос маһемас «Лылың сәюм» колт сосса хәтпат няврамыт әт рүпитэгыт.

Ам Алексей Александрович Решиковын сәв емас сымың ләтың ләвэгум, тав хосытэт пыгум мәнщи ос ханты эрыгсов тәныт вәңкве патыс, эруптаңкве патсанэ, сәңквилтапыл сәңквилтаңкве хәсы. Ты тәл университет аһты, ос сәңквилтапыл ос аквта холыт элалы сәңквилты.

Ты хәнтхатыглап вәрум хәтпатн ам пүмащипа ләтың ләвэгум. Сосса мир эргыт-йикквит элалы вос тотыяныл, ма янытыл олнэ мирн вос вәвет.



Александр и его мама Светлана Григорьевна Замиралова



# Султум

**Искорка**

## Мы любим культуру коренных народов Югры

*Александр Замиралов занимается в школе мастеров в Окружном Доме народного творчества в Ханты-Мансийске. В конце мая состоялся отчетный концерт, Александр исполнил наигрыш А.Г. Гришкина «Тугиянская куринька». Молодой человек рассказал о своём творчестве:*

– Мне очень нравится играть на традиционном музыкальном инструменте санквилтап, каждый год новые наигрыши учим, бывает по несколько наигрышей сразу разучиваем. Я с начала 2012 года в «Лылың сәюм» ходил, тогда в 6 классе учился, потом здесь стал обучаться. Уже 12 лет занимаюсь творчеством. Учусь в ЮГУ, в этом году заканчиваю магистратуру по направлению техно-сферная безопасность.

Сам я русский, мы с семьёй в Ханты-Мансийск переехали из Курганской области. Мне и моим родителям очень

нравится культура ханты и манси, и через музыку познаём её. Мама и папа очень рады, что я играю на традиционных музыкальных инструментах.

Моя мама Светлана Григорьевна поддерживает меня в моём творческом пути, во время выступлений переживает. И когда я уезжаю на гастроли, на выступления, ждёт меня и радуется, когда я привезу дипломы, бывает, занимаю призовые места. Недавно мы с руководителем нашей школы Алексеем Александровичем Решиковым выиграли Гран-при, мама так счастлива была.

Мама Александра **Светлана Григорьевна Замиралова** сказала:

– Я очень довольна выступлениями моего сына, и рада, что преподаватель Алексей Александрович Решиков привил ему любовь к традиционной музыке северных народов. И сейчас, уже заканчивая ВУЗ, Саша продолжает заниматься творчеством. Большое спасибо руководителю и тем, кто организовал это мероприятие.

**Светлана  
РОМБАНДЕЕВА**



В.В. Ишматов



В.В. Ишматов во время учебы в медицинском училище г. Ханты-Мансийск (1-й слева в первом ряду).

## Ват арыгкем тал лёккарыг рупитас

**Х**анты ойка Владимир Власович Ишматов мөлты тал «Почётный житель Кондинского района» нампа яныг намыл Хонтаң район 100 талэ төвлум порат майвес.

Тав сав тал лёккарыг рупитас, ётыл Хонтаң район миркол кұшай ваңын хөтпаг олыс, сасса махумн нётнэ тэлат щирыл пуңкотыс.

Такви рупататэ ёмашакв, кәркамыг вәрыстэ, таимәгсыл тот олнэ мирн сака янытлаве. Ань тав экватэ ёт Хонтаң район Кондинский павылт олэг.

Владимир Власович ёт ам ты павылн ялмум порат хөнтхатыгласум ос олупсатэ, вәрум рупататэ урыл китыгласлум. Тав потре элаль ловиньтэлбн.

### Ханты латың урыл

– Ам Хонтаң район Болчары павылт самын патсум. Пёсйиспоратәгыл Алтай, Кама, Болчары Ермак, Лемино, Летние Пушты и Зимние Пушты павылт ханты махум олсыт ос Кондинский павылт Урай үс нупыл – мәнщит.

Атям ханты хумыг олыс, омам руш нэг. Атям щань латңыл ёмашакв

потыртас, омам латың ос вәстэ, юн тән тәнки халэнт ханты латңыл потыртасыг. Ам мәниг олмум порат латың хулыгласум, тувыл школат хаништахтункве овылтахтасум, омагум-әтягум тәнки халэнт туп руш латңыл потыртаңкве патсыг. Тох латңув молях хот-ёрувлахтас.

Кондинский павылт кит яныгпәла ойкаг олсыг, нила-ат тал ювле хультум порат әтимиыг ёмтсыг. Акватэ наме Михаил Федорович Ирпин, тав яныгсәт тал мус олыс, хөнтлаңкве ялыс.

Мөтанэ Иван Пантелеймонович Сарманов, тав ос 99 талэ порат әтимиыг ёмтыс, тән ханты латңыл потыртасыг. Ойкаг сас Летние Пушты павылт самын патсыг, ты павыл Болчары ляпат үнлыс. Кондинский павылт Савиновы, Ельпины, Чемляковы ханты щёмьят олсыт, тән ос щань латың вәсыт. Ань ты махум пуссын әтимиыг ёмтыс.

### Яныгмам поратэ

Щёмьявтмән атнәврам яныгмасүв. Ам щар яныг олсум, акв порат омамн уютг мәгсыл кетвёсум. Павыл хосыт ёмим кұть-выт кәсаласум, тән ётаныл ёнгуңкве кусыгласум. Ты вәрмалль мәнполь этпос олыс, та порат тән палтанылн новхатуңкве ат рөви.

Ам иң мән нәврам, хунь вәслум, пукин та төвмасавёсум. Люньшим юв хайтсум, тәра лёккар палт тотыгпавёсум, нюлмит лап-юнтвёсыт, тәрпил сартвёсум. Хунь пусмысум, номтыл ёхтувёсум – лёккарыг рупитаңкве тах патэгум.

1961 тәлт юртпыгум Иван Мокроусов ёт лёккарыг Ханты-Мансийск үсн хаништахтункве минасамән. 1965 тәлт фельдшерыг Богданы павылн рупитаңкве кетвёсум. Ты павыл Алтай павылныл лөңхаль 25 вёрыстат үнлыс.

Төнт ты пёс павылт вөр сәгрин хөтпат рупитасыт, ам ты махум пусмалтасанум. Аквта тәлт таквсы армиян вуйвёсум, 1968 тәлт юв ёхтысум ос тәра Болчары павылт

пұльницан фельдшерыг паттувёсум.

Ам акваг элаль хаништахтункве номсысум, та порат лёккарыт мощца олныл ойтвёсыт. Олн сәлуңкве леспромхозн рупитаңкве патхатасум.

Ты юи-пәлт Омск үсн яныг лёккарыг хаништахтункве минасум. Та үст хөт тал хаништахтасум, диплом-нәпакт хасвёсум – «врач эпидемиолог».

Ётыл ювле Кондинский районын ёхтысум. Хаништан мәныл хунь әстласум, эквам ёт кит нәврам ошсумән.

Кондинский павылт санэпидемстанцият лёккарыг паттувёсум. Лёккар кұшаиг тот мәнлат нә Людмила Павлова олыс. Мән тав ётэ аквьёт хаништахтасмән, тав акв тал сартынув әстлас ос Кондинский павылн направление-нәпакт щирыл кетвес.

Тав хұрум тал лёккарыг тот рупитас ос тәра такви яныгмам павылн минас. Ты юи-пәлт ам лёккар кұшаиг 1976 тәлныл 1990 тәл мус тот рупитасум.

### Варум рүпататэ

Та порат Хонтаң районт ӧлнэ мир вӧр сӧгрим, хӱл алышлым ос вӧраим рүпитасыт. Ёмас пӱльница Хонтаң районт ӧс аitim ӧлыс. Акв организацият аквторыг сӧв мӧхум ағмыл ке ёмтӧгыт, мӧн тӧра тув та кетавев.

Маныр тӧн тӧсыт, хотыл вит айсыт ос мӧт вӧрмалит урыл китыгласанӱв, анализыт висӱв. Хотыл ағмыл хӧхтувевсыт ос хумус пусмалтаңкве, тӧнт уц лӧвуңкве вӧрмысӱв.

Сосса мӧхманув нӧрхул, солвалың хӱл тӧсыт, тымӧгсыл тӧн сӧв сорыгӱй ӧщсыт. Описторхоз ағм пусмалтым, тӧрпит шаквитыл юв-аюңкве

ӧрыс. Тох пусмалтым сӧв мӧхманув мӧйтаныл ағмыңыг ёмтсыт. Ань матьёмас мӧт тӧрпит ӧлӧгыт.

Мӧнь нӧврамыт та порат брюшной тиф, оспа, скарлатина ос мӧт ағмыл вӧтихал ёмталасыт, ётыл уц прививкал вӧруңкве патвевсыт. Тувыл тӧва ома-ӧтят тамле тӧрпил нӧврамыт тӱштуңкве шар ат кӧсащасыт.

Акв тӧлт вӧраян, хӱл алышлан мӧхум туляремия ағмыл ёмтуңкве патсыт. Ты ағм мӧтапришит ӧньщегыт, хӧтпа вӧрт яласым, пӧнқың вит ке ай, пӧнқың кӧтыл ке тӧг, ты ағмыл ёмтуңкве вӧрми. Тӧнт прививка ӧлыс, пӧвлың мир уколыл вӧрсанӱв.



### Владимир Власович Ишматов

Родился 26 ноября 1946 года в с. Болчары Кондинского района. Вся его трудовая деятельность связана с Кондинским районом. Закончил Омский государственный институт им. Калинина, санитарно-эпидемиологический факультет с 1978 г. занимал должность главврача районной СЭС. В 1990 г. был избран председателем Кондинского райисполкома, в 1994 г. главный врач Центра Госсанэпиднадзора в Кондинском районе. С 2001 г. заместитель главы Кондинского района по вопросам малочисленных народов Севера. С 2005 г. первый заместитель главы Кондинского района.

Мӧтыт тӧл шар мӧнь нӧврамаквет ты ағмыл ёмтсыт. Мӧн номсахтуңкве патсӱв, ты ағм акв элумхӧлас мӧт элумхӧлас хӧхтуңкве ат вӧрмитӧ. Москва ӱсныл ос Тюмень ӱсныл лӧккарыт ӧхтысыт.

Мӧн нӧврамыт тӧнэ тӧнутаныл, айнэ вит, пормасаныл, маснутаныл лабораториян кетсанӱв. Тох кисхатым нӧматыр аты хӧнтсӱв, тувыл акваг сӧв нӧврамыт ағмыңыг ёмтсыт.

Ағм лӧмвуиң порат нӧглыс, тӧнт уц номтыл ӧхтувевсӱв ос лӧмвуит лаборатория-колн Москва ос Тюмень ӱсыгн кетсанӱв.

Тӧнт лӧккарыт лӧвсыт, мӧнь нӧврамыт ты ағмыл лӧмвуитн хӧхтавет. Ты юи-пӧлт мӧнь нӧврамыт ос пӧвлың мир пуссын прививкал тӱштысанӱв.

Мӧн нӧврамыт ханищтахан колыт, нӧврамыт ӱргалан колыт, тӧнут пӧйтнэ колыт, ат хӱратан колыт уральтасанӱв.

Школат ос садикыт нӧврамыт, тӧнут пӧйтнэ колт ӧныт, пӱтыт хумус ловтавет, тӧнут хӧт ӧньщавет, колкан хумус ловтаве, ёмашакве уральтасанӱв. Тамле рүпата ӧс вӧрсӱв.

### Сосса мӧхумн нӧтыс

Ётыл Владимир Власович районный миркол кӱшай вӧңын хӧтпаг паттувес, тот тав сосса мӧхумн нӧтыс. Ты рүпататэ ӧс сака кӧркамыг вӧрыстӧ. Миркол кӱшай вӧңын хӧтпаг хунь рүпитас, Кондинский пӧвылт нӧврамыт ӱшлахтан «Мит уц» нампа кол ӱнттувес, Шугур пӧвылт «Нӧврамыт пӧвыл» ӱшлахтын мӧ вӧрвес.

Тӧнт сосса мӧхум ӧлнэ пӧвыл школат пуссын «национальниг» хасвевсыт, нӧврамыт щӧнь лӧтңын ханищтавевсыт. Тав рүпитаме порат сосса общинат, нусаг ӧлнэ сосса щемьят ёмашакв нӧтвевсыт, олныл ос пормасыл тӧстувевсыт.

Владимир Власович лӧвсыт, такви мӧхманэ мӧгсыл сыме акваг шарги, таимӧгсыл сӧвнув ӧрнэ рүпата тӧн мӧгсыланыл вӧруңкве таңхыс. Сосса мирытн сӧв ёмас тӧла вӧрме мӧгсыл ханты ӧйка «Лауреат премии ХМАО-Югры в развитии традиционных отраслей хозяйствования малочисленных народов Севера» нампа мӧглын тагатап пӧсыл майвес.

### Людмила ТЕТКИНА

Кондинский пӧвыл музейныл кӧтым хурит



В.В. Ишматов во время учебы в Омском государственном институте им. Калинина (ордена Трудового Красного знамени), санитарно-гигиенический факультет (4-й слева во втором ряду).



Коллектив СЭС Кондинского района. В.В. Ишматов, главврач Кондинской райСЭС (6-й слева).



Мәньци хөтпаг – Т. Тарасова ос А. Сайнахов



Ханты хум Е. Наков кўцаит ёт потырты

## Мәщтыр мәхум акван-атыглавёсыт

**Т**ы этпос 21-23 хөталанэт Сургут үст сәв мәщтыр хөтпа акван-атыглавес, тән мәгсыланыл яныг мәщтырлан кан вәрыглавес. Ты ёмас тәла руц ләтңыл тох ләввес – Международный фестиваль ремесел коренных народов «Югра».

Хүрум хөтал сыс Сургут үст өлнә мәхум тув ёхталасыт, нас ёмыгтасыт, пүмшалахтасыт, сунсыглахтасыт. Хотьют кәсащас, матыр пормас вәруңкв манос матыр юнтылматуңкв вөрмыс.

### Сәв мәныл мир ёхталас

Тув Россия сәвсыр элы мәныл ос мән округвныл мәщтыр хөтпат вөвыглавёсыт, тән хүрум хөтал тот рүпитасыт. Овыл хөталт хөталъят юи-пәлт тән яныг кўцаитн янытлавёсыт, тувыл тәнти янас мән минасыт ос мәщтырлаңкв та тұлхатасыт.

Ты мәхум «Пёс Сургут» музей үнлын мәтә янытыл пуссын ләкквә-үнтүвёсыт. Акв мәт нәквет рактныл сәвсыр аныт пөщгысыт, тувыл элнув мөт хөтпат үнлысыт, тән тәнти вәрум маснутаныл, хораманыл ос мөт сәвсыр пүмыш ос нётнә

пормасаныл тыналасаныл.

### Юнсахтам сосса нәквет

Мәньци ос ханты нәквет, хум хөтпат ос аквты щырыл ләкквә мәт үнлахолсыт. Төва нәквет аканил майвёсыт, тәнанылн ты акань мәгыс маснут юнтуңкв эрыс. Тувыл юи-өвыл хөталт ты маснутыл мастым акань мирн вос суссылтыяныл. Я-ты, тән юнсахатуңкв та өвылтахтасыт.

Мәньци нәкве Татьяна Ермиловна Тарасова тот ос блыс, тав центр ремесел округ колныл тув вөввес. Сургут үсн тит нуйсахи ёт-тотыглас, сакныл хартым сәвсыр турлөпсыт, пальсакыт, совьа вай ос щирва вай пуссын тот суссылтас.

### Хум хөтпат урыл

Хум хөтпат ос сәвсыр мәтт мәщтырласыт. Мәньци хумиов Алек-

сандр Сайнахов тит хумыг ёт парщин кол тиврыт ёргашлахтас. Тав ётә Егор Наков ос Удмуртияныл ёхталам хум рүпитасыг. Тән кәсыңе матыр вәрыс, Егор ос Александр хоса аны вәрсыг, Удмуртия хум ос йивныл тотапсов мәщтырлас.

### Тёранак вәрвес

Тёранак хумус вәраве, ты тәла Яскевич Лидия Ивановна суссылтас, тав Нижневартовский район Аган пәвылныл тув ёхталас. Ханты эква ләвыс, тўяг тав такви ўльпа тәрыт атыс, ёмащакв щёпитасанә. Тёранакыт вәруңкв такви ханищтахтас, вәрум тёранаке пуссын тыналыянә.

Тав ләвыс, тёранакыт щәщёкватә вәруңкв ёмащакв хәсыс, тувыл агитә ханищтастә, ты Лидия тав оматә. Лидия яныгмас, ос щәнән хўлтвес. Ань ты мәщтырлан наке элалы тотытә, мөт нәквет, мәньлат агит ханищтыянә.

Акв хөтал хөт щёс порат тав пәлтә сәв хөтпа ёхталас, тав мирн потыртас, ўльпа тарыт хумус атавет, хумус сыстамта-

вет, ёмащакв хумус щёпитавет. Тёранак хумус вәраве, таи ос суссылтас.

Сәс урыл тот ос потыртасыт. Титыт хөталт ты мәщтырлан мәхум мәгыс ханищтап вәрыглавес, тох намаим блыс – «Береста реки Аган». Ханты экват мөт мәхумн суссылтасыт, сәс ёт хумус рүпитэгыт, сәвсыр хусапыт хансал хумус щуртыяныл.

Мәньлат нә Наталья Ачимова «Пёс Сургут» музейт ань рупиты. Такви ос Нижневартовский район ёрныл блы. Сәлы сов хумус сыстамтаве, кәминьтаг хумус тынтлаве, нә ань таи урыл мәхумн потыртас. Ты тәла өвылтыт Ханты-Мансийск үсныл ёхталам хөтпат сака пүмшалахтасыт, тина-охса пөслысыт.

### Няврамаквет ханищтавёсыт

Няврамыт мәгыс ос янас мәщтырлан кан щёпитым блыс, тох ләввес – «Подворье». Сәвсыр пүмыш вәрмалы тән мәгсыланыл тот блыс. Хүрум хөтал сыс пёс ёнгилыл ёнгалтавёсыт, ярмак төр тармыл сәвсыр



*И. Кошелева, Я. Сопочина ос Л. Мелентьева*



*Руц нэ рактныл пöщги*

нётнэ хурит пöслысыт, сыплувн тагатын хорамыт вәрсыт, тисгын ут вәрунқк ханищтавёсыт, сәвсыр аканит юнтсыт.

Ханты-Мансийск үст öлнэ ханты эква Галина Шиянова тәнаныл ханты аканит юнтуңкв ханищтасанэ. Ямал мәныл ёхталам ёрн хум Роман Яндо сәлы тоңх тармыл хансат пöслуңкв агитпыгыт ханищтасанэ.

**Номтың потрыт хўнтлысыт**

Акв колт мәщтырлан нак урыл потыртан мәгыс конференция вәрыглавес, пуңкотнэ хөтпаг тот Москваныл ёхталам академик-ойка В.Б. Кошаев öлыс.

Тав ләвыс, юи-öвыл тәлытт мәнь пәвлың мәтт öлнэ хөтпат тән ты мәк мәщтырыг ләвуңкв патвёсыт. Ты хөтпат нэмхотталы сака ат ялантэгыт, тәнти хәснэныл щырыл мәщтырлэгыт. Тамле ты хөтпат ань сака эрэгыт.

Тувыл тав сәв пұмыш пормас ос кәтыл пöслым хури суссылтас. Кәсыңе урыл янас потыртас. Хурит суссылтанётэ порат тав тох вәрыс – акв хури ущты пöслым öлы,

мөт хури пёс йис порат пöслувес.

Владимир Борисович тох ләвыс, ты хурииг сас мәк тыныңыг öлэг. Искусства тэлат ёмашакв вәнэ хөтпа тав вәгтэ, ты йист вәрим хоты пормасыт ос пöслым хурит мирн пұмщалаңкв сәв тәл минам юи-пәлт патавет.

Акв щырыл хурит пöслуңкв ат эри, хөтпа такви номсахтынётэ щырыл пöслуңкв те паты, тонт ты мәк эрнэ хури та тэлы.

Ты öйка юи-пәлт сәв хөтпа тәнти хансум потраныл, төват ос тәнти маснутаныл, пормасаныл урыл потыртаңкв патсыт. Ос хұрум щёс сыс сака мощща хөтпа потыртаңкв алымас, төват нэматыр ләтың аты ләвсыт.

**Янытлан вәрмалы**

Ты фестиваль хұрмит хөталёт рұпататэ та астыс. Тув ёхталам хөтпат халанылт ёмашакв юрщхатасыт, ханищтахтасыт. Кәсың ёхталам мәщтыр хөтпа янытлавес, кәсыңе урыл сәв ёмас ләтың ләввес. Тувыл тән пуссын ләкква та мингаласыт. Төва хөтпат ёт ам потыртасум, тән потраныл



*Ханты нэ Т.С. Уколова*



*Саран нэ шулкин суссылты*

газетат хансуңкв тах патыяnum.

Матъёмас ты йист сосса мәхманув пёс вәрмалянуv, пёс мәщтырлан наканув хот ат ёруvлыяныл, мөт мирн суссыл-

тыяныл. Ань мәк мәщтыр хөтпа мощща хультыс, тән мәньлат хөтпанув ты вәрмалитн вос ханищтыяныл.

**Валентина ХОЗУМОВА**

# Ты ёрн нэ наме Нечей



Н. Сэротэтто



Ямал ты щирыл Москва ўст суссылтаве

**Хурит пöслым Ямал мät öлнэ ёрн нэ наме Нечей Сэротэтто, тав ётэ мён Москва ўст вайхатсумён. Тув савсыр маныл махум ёхталасыт, танти мираныл ос блупсаныл урыл потыртасыт.**

Ты ёрн нэ омаге-äтыге тунраң мät сáлы ўрим яласэг. Тэн павлың мät öлуңкв шар ат кáсащег. Нявраманэн öс тох öлэгыт, туп ты äгитэн ань Салехард ўст öлы, тот рүпиты.

Нечей тох лавыс:

– Омагум-äтыгум сáлың хөтпаг, тунрат öлэг, сáлыянув ўрим рүпитэг. Мән пуссын сáлың колт яныгмасүв. Ам ань Ямальский колледжит рүпитэгум, тот ханищтахтын няврамыт ёрн лätңыл потыртаңкв ханищтыянув.

Ам мән щáнь лätңув мäгсыл сымум сака щäрги, ты йист яныгман няврамыт щáнь лätңыл потыртаңкв ат вөрмөгыт. Юи-öвыл тáлытт сáв хөтпа ўсытн öлмыгтэгыт, тот танти халанылт туп руц лätңыл потыртэгыт, щáнь лätңаныл та ёрувляяныл.

Ам äгим самын патме

юи-пáлт тав ётэ туп ёрн лätңыл потыртасум. Тав садикн миннэ поратэ ёхтыс, ам таве тув та тотыслум. Ос äгим руц лätңыл потыртаңкв шар ат хáсы, ты лätың ат торгамтытэ. Воспитателит тав ётэ туп руц лätңыл потыртэгыт.

Тох та ёмтыс, äгим руц лätың вáңкв патыстэ. Сáв рүпитанэм мäгыс таве хотьют ёт юн хультуптылум, таимäгыс садикн та минас.

Ляпа рүтанум äгирищаныл öс ёрнколт яныгмас. Тав яныг павлытн манос ўсн шар ат тотыглавес, мультикыт сунсым такви руц лätңыл потыртаңкв патыс. Омаге-äтыге тав ётэ ёрн лätңыл потыртэг, тав ос ювле руц лätңыл лави. Тох ты мäнь няврамаквет щáнь лätңаныл хот-ёрувляяныл.

Ос акв ёмас тэла урыл ты ёрн нэ äнумн потыртас. Насати, Ямал мät

хөт сáв сáлың колыт акв ляпат öлэгыт, тув няврамыт ханищтан хөтпа тэтаве. Тав тот öлы ос няврамыт тот та ханищтыянэ.

Ты няврамаквет ўсн ат тотавет, тән интернатт ат öлэгыт. Оманыл-äтыяныл ёт ляпат öлым, ёрнкол тиврыт та ханищтавет. Яныгнувег ёмтэгыт, тонт уц интернатн тотавет.

Ты ёрн нэкве Нечей Сэротэтто наме ань мä янытыл суйты, тав ООН нампа организация пälыл хөт-äти сáвсыр мät яласы, такви мире блупса урыл потырты. Мөлты тäl Объединенный Арабский Эмираты мән Дубай ўсн ялыс. Тот акван-атхатыглам махум мä-вит ўргалан вәрмалы урыл потыртасыт – юи-öвыл тáлытт сыс сака мälтыпыг ёмты, мätэ-витэ люлиг ёмты.

Тот Нечей ёрнанэ урыл потыртас, хумус тән Ямал мä хосыт вäнтлэгыт, хумус öлэгыт, сáлыяныл хумус ўрияныл. Щáнь лätңаныл урыл тав тот öс потыртас, тән тыкос сáв мирың махум, танти щáнь лätңаныл öс ўргалым öньщияныл, сáвсыр рүпата, сáвсыр йильпи тэла номылматэгыт, ты хосыт рүпитэгыт.

Нечей ань лавыс, шар мäнь няврамаквет мäгыс ань вäти мультикыт пöслуңкв эрэгыт, тот пöслым ўйквет, вөруйт пуссын мощцаг хультум мир лätңыл вос потыртэгыт. Ты щирыл няврамакве мультикыт сунсым, такви щáнь лätңе хулуңкв патытэ.

Мөлты тäl нэ Россия янытыл вäрыглым касылт касыс, та касыл тох намайлвес – «Моя страна – моя Россия». Нalыман нупыл хөт хөтпа ёт ты нэ тот янытлавес, олныл майвес.

Мöt касылт тав öс нöхпатыс, акв млн солкöви сáвит олның мүйлупсал майвес. Ты олнытыл тав ёрн лätың ханищтан программа щёпиты, мäнь няврамаквет танти лätңаныл вос ханищтыяныл.

Ты нэ сака кәркамыг öлы, «Ямал – потомкам» ассоциацият рүпиты, такви мäхманэ тармылпатыянэ, ўргалыянэ, тән öвылтыт хөт-äти яныг кўцаит элы-пáлт акваг потырты.

Тамле ты тав ёмас нэкве, кос хоталь мины, ёрн махум нуйсахил масхаты, такви маснуганэ суссылтым мирн лätың тоты.

**Валентина ВАСИЛЬЕВА**

Эква-пыгрищ акв-экватэнтыл олэг. Хоса олсыг, вати олсыг, Эква-пыгрищ лави:

– Ам марщумыг емт-сум, хоттал та минэгум.

Эква-пыгрищ тув минас, хоталь номтэ паты. Минас, минас. Акв колн ёхтыс. Тот Мёңкв ойка ўнлы, пуңке сака посың. Мёңкв ойка пуңке консы, сәңквылтап вис, лави:

– Сәңквылтап, кыр, кыр! Акв тал яныт хәр вос тотнуве, алмаянуве, вос алаве!

Акв тал яныт хәр алмаястэ, юв тўлыстэ, та алыстэ, нуйгаластэ, няр-нёвиль яктыс. Нярнёвиль акв ёр тармыл пиныстэ. Эква-пыгрищ хәр ёт юв шалтыс, ави сыс пәлн тўйтхатас.

Тувыл нярнёвиль вистэ, акве палт тотсанэ. Мёңкв ойка нёвиль та кос кинсыс, ат хонтыс.

Эква-пыгрищ акве палт ёхтыс, нярнёвиль тэсыг, ёл-хуясыг. Холытан тав нёх-квәлыс, оста минас. Мёңкв ойка палт ёхтыс. Мёңкв ойка пуңке консы ос сәңквылтап вис, лави:

– Сәңквылтап, кыр, кыр! Кит тал яныт хәр вос тотаве, вос алаве!

Эква-пыгрищ щёвал сўнтныл сунсы, тувыл хәр ёт юв шалтапас. Мёңкв ойка хәр нуйгаластэ, нёвиль яктыстэ, пўтэ вәрыстэ. Нярнёвиль акв ёрн пиныстэ. Эква-пыгрищ нярнёвиль вис, кон та ояс. Акве палт

## Эква-пыгрищ урыл мойт

ёхтыс, нярнёвиль юв-тэсыг. Мёңкв ойка нёвиль кинсыс, ат хонтыс.

Эква-пыгрищ хуяс, холытан ос Мёңкв палт та минас. Мёңкв ойка пуңке консы. Сәңквылтап вис, лави:

– Сәңквылтап, кыр, кыр! Хурум тал яныт хәр вос тотаве, вос алмаве!

Хурум тал яныт хәр тотвес. Мёңкв ойка таве яктыстэ, нёвиль акв ёрн пиныстэ. Эква-пыгрищ нярнёвиль оста алмаяс. Мёңкв ойка нёвиль такос кинсыс, ат хонтыс...

Тав лави:

– Маныр мән ам ёхтысум, акваг нёвиль тўлмантаве?!

Эква-пыгрищ аквэква ёт нёвиль тэсыг, ёл-хуясыг. Алпыл тав оста минас. Мёңкв ойка палт ёхтыс. Мёңкв ойка пуңке консы. Тав сәңквылтап вис, лави:

– Сәңквылтап, кыр, кыр! Нила тал яныт хәр вос тотаве, вос алмаве!

Нила тал яныт хәр вёвыстэ, алыстэ. Эква-пыгрищ хәр ёт юв-шалтыс. Мёңкв ойка няр-нёвиль суп ёлы-пәлн тўйтсанэ. Эква-пыгрищ кәтэ тув-нарумтастэ, няр-нёвиль тўлмантас. Мёңкв ойка сунсы: суп ёлы-пәлн нэматыр атим.

Хоса олыс, вати олыс.

Эква-пыгрищ ос Мёңкв ойка палт ёхтыс. Мёңкв ойка пуңке консы, сәңквылтап вис, лави:

– Сәңквылтап, кыр, кыр!

Ат тал яныт хәр вёвыстэ, алыстэ, нярнёвиль мольщаң ёлы-пәлн тўтыстэ. Эква-пыгрищ хәр ёт юв шалтыс. Тувыл тав мольщаң ёлы-пәлн шалтыс, нярнёвиль хот-вис, та тахас. Юв ёхтыс, нярнёвиль тэсыг, хуясыг. Воссыг алпыл Мёңкв ойка палт ат мины.

Аквнакт аквэква тавён лави:

– Мёңкв ойка наңын вёвыстэ.

Эква-пыгрищ тув минас. Ёхтыс. Мёңкв ойка сәңквылтап вис, лави:

– Кыр, кыр, Эква-пыгрищ вос тотнуве, вос алмаве!

Эква-пыгрищ хоттал та тотаве, та тотаве. Ёхтыс, щёвал сўнтын ёхтыс, ахвтас поталы тәрматас, пўт кйвырн ахвтас шалтыс. Мёңкв ойка лави:

– Маныр ёмас! Няр-нёвиль тўлмантан ўт пўт кйвырн та шалтыс!

Мёңкв ойка пўт равтас – тот ахвтас поталы. Эква-пыгрищ нёх-лўлис, акве палт минас, акве палт ёхтыс, акве щәгтыс.

Мёңкв ойка сәңквылтап вис, лави:



– Кыр, кыр! Эква-пыгрищ вос тотаве, вос алаве!

Эква-пыгрищ та тотаве, та тотаве. Тав лўймас вис, коләла сурум сўнт палт ёхтыс, лўймасыл Мёңкв ойка пуңке рәтыстэ, алыстэ. Эква-пыгрищ юв шалтыс, сәңквылтап вис, акве палт та минас.

Тав ань та шуни, ань та хўлы.

**Ты мойт 1951 тәлт Лопмуст олум нэ хөтпа Матрена Сидоровна Хуринова тав мойтыстэ, Эква 70 тәлэ блыс. Мойт нэпакн Е.А. Кузакова хансыстэ.**

Лүймә сәрипос  
(Северная заря)  
№ 12 (1318), 27.06.2024  
Соучредители  
Дума, Правительство  
ХМАО – Югры  
Издатель  
Департамент внутренней  
политики  
ХМАО – Югры

Редакция  
ВРИО главного редактора –  
**Рагимова Н.В.**  
Телефон (3467) 33-24-02  
Заместитель главного редактора –  
**Кондина Г.Р.**  
Телефон (3467) 33-22-72  
Ответственный секретарь –  
**Узель В.В.**  
Телефон (3467) 33-23-09

Адрес редакции и издателя:  
628011, г. Ханты-Мансийск,  
ул. Комсомольская, 31  
тел./факс (3467) 33-17-52  
E-mail: gazeta@khanty-yasang.ru  
Газета размещена на сайте  
[www.khanty-yasang.ru](http://www.khanty-yasang.ru)  
Отпечатано:  
ООО «Новости Югры-  
Производство» г. Сургут,  
ул. Маяковского, д. 14.

Индексы 04399, 54399  
Тираж 1710 экз.  
Заказ 2635  
Цена свободная  
Мнение авторов  
публикаций не  
обязательно отражает  
точку зрения редакции.  
Газета зарегистрирована  
Управлением Федеральной

службы по надзору  
в сфере связи,  
информационных  
технологий и массовых  
коммуникаций  
по Тюменской области,  
ХМАО-Югре и ЯНАО.  
Свидетельство  
о регистрации  
ПИ №ТУ 72-00795  
от 23 января 2013 г.

12+



Д. Махиянова, Э. Лачинова ос Я. Юркова



Хум сорыгуй сунсыглы

## Нёвыль ос хул уральтан хотпат

**М**ән округут «ветеринарный лабораторияг» лавнэ бвыл кол 1907 талт пүсвес. 1938 талт округут янытыл хурум павлытт тамле лёккарыт рүпитаңкв патсыт – ты Сургут, Самарово ос Сытомино павлытт.

Ты йист мак яныг лаборатория-коланыл Ханты-Мансийск үст блы. Юи-бвыл талытт тән танти вәрнэ рүпатаныл урыл мирн потыртаңкв патсыт. Тот рүпитан лёккарыт ёт хонтхатыгламув порат титыгласанүв, тән хумус рүпитэгыт, маныр вәрэгыт.

**Динара Фарзетиновна Махиянова** куцай ваңын хотпаг блы. Нэ лавыс, махум тэнут уральтаңкв таңхёгыт те, тән ты лаборатория-колн танти ёхталэгыт.

Хул, нёвыль, айнэ вит, овоцит, пилыт пуссын уральтаңкв эри. Вит-хургыт ос помиторыт тивранылт сав лёль ут ёнщёгыт, тән нитратыг лававет, таимагыс уральтаңкв акваг эрэгыт.

Хулыт урыл лёккар нэ тох лавыс. Щар мак сав сорыгуй, руц щирыл лававе – описторхоз,

хулумхул ёнщи, панти лещ, түрхур ёс ёнщёг кос, ос тыгыл мощчанув.

Сорт, сымри ос мот сорыгуй ёнщёг, тав лававе – дифиллоботриоз. Таве самыл кәсалаңкв рёви, тав элмхблас сахыт тиврыт ловмантем метраг яныгми. Ты хулыг сорыгуй-капай савми, нярхулыг тэнатэн тэңкве щар ат рёви. Тананыл ёмащакв пайтуңкв ос солвалтаңкв эри.

Сукыр ос сорх яңк хулыг лававёг. Асхул, карай ос моксаң хулыт тән ты щар сыстам хулквет, нэматыр сорыгуй ат ёнщёгыт.

Мот нэквег, акватэ **Яна Юрьевна Юркова** химико-токсикологический отделения кўщаиг блы, мотанэ **Эльмира Хайдаровна Лачинова** радиолог-лёккарыг тот рүпиты. Ты колнакт рүпитан хотпат 2011 талныл

савсыр тэнутытт радиация тинсуңкв патсыт.

Вәрнэ рүпатаныл ёс сака пумыщ. Тән «цезий-137» ос «стронций-90» нампа радионуклидыг лавнэ ут тинсэгыт. Ты щар пылыщма ут, хотпа ты утыл те лылты манос тэнут ювтэг, радиация тав алпитэт атхаты. Тувыл ты хотпа сака агмыңыг ёмты, хоса блуңкв ат паты.

Ты радиолог-лёккарыт ма, вит, вёрт яныгман ййыт, вёруй совыт, уйхулыт тыттын тэнутыт, сылым партыт, хул, нёвыль щар пуссын уральтияныл.

Ты лёккарыт тох лавсыт:

- айнэ вит – 24 савсыр щирыл уральтаве;
- нёвыль – 17 щирыл;
- хул – 13 щирыл
- маг – 14 щирыл.

Матыр лёль те хонтаве, нёвыль, хул, маг тыналаңкв щар ат рёви. Ос това хотпат тэнут мот маныл мән мавн тыналаңкв тотыяныл. Тананыл анализ вәруңкв тыт ат эри, тән ёмащакв

уральтым тэнут тыналэгыт.

Това үст ань тыг мус рынок нампа тыналахтын каныт рүпитэгыт, тот янас лёккар үнлы. Тав такви тэнутыт уральтиянэ, эрнэ порат анализ вәри.

Туи пора ты бвылтахтас. Ань тыг мус кон сака ащирма блыс, рёгыңыг ёмтыс, товлыңуйт тыг ты ёхтысыт. Тән тыг ёхтынэныл порат «птичий грипп» ёт-тотэгыт. Юн ёщнэ товлыңуйт (васыт, лунтыт) кон тартуңкве ты порат ат рёви, тән тара ты агмыл ёмтэгыт.

Агмың товлыңуй вит вёңхат те уйгалас, ос юн ёщнэ товлыңуй ёс тув те исыс, агмыңыг та ёмты, нёвле тэңкве щар ат рёви. Тавёныл мот уит пуссын та хатхавет.

Тох ты ветеринарыт рүпитэгыт, тән вәрнэ рүпатаныл мирн эри, тән хосытаныл мир ёщнэ агмыт мощцагнувек ёмтэгыт.

**Валентина  
ВАСИЛЬЕВА**